

Biografia futbolístico di Juby Richardson



ORANJESTAD (AAN) - Manera cu DIARIO a trece den su edicion di Diasabra ultimo, e Mini Campeonato Mundial di Futbol Veteranos cu lo hiba e number di "ROMA '88" lo inicia dia 26 di Nuni venidero y lo tin un duracion di 3 siman.

E aña aki ROMA lo dedica e campeonato na un di e hungadornan mas grandi cu Aruba y Antillas a conoce den ultimo temponan, cu ta nada menos cu Juby Richardson, manera cu e ta conoci popularmente, a nace na Aruba dia 1 di Januari 1942 y ta jiu di un familia cu a produci hopi deportista grandi pa Aruba. Nombenan manera Jimmy y Frank ta conoci pa tur hende cu a sigui e deporte di futbol e ultimo 20 añanan. Su ruman muher Viola tabata añanan largo un estrella indiscutible di softball mientras cu tambe el a destaca ariba tereno di softball y atletick, Sharlene, otro ruman muher.

Pa practicamente henter su carrera futbolístico Juby a militaden oncena di Dakota y a forma parti di e oncena aki na aña 1961 ora cu e prome titulo campeonil di Dakota a keda conquista. Manera ta conoci Juby tabata ocupa e posicion di portero pero contrali na mayoria futbolista cu ta portero Juby por hunga e posicion di delantero sin problema. Juby

tabata posee hopi tecnica y dominio di e bala y practicamente por wordo considera como un mago cu e bala. Aparte di futbol Juby tabata domina deporte di softball tambe hopi bon.

Ariba e tereno di softball Juby a sabi di destaca tambe. Pa diferente aña Juby a hunga pa e team campeon di softball di e

tempo ey, Casa Haime y a defende e colornan di Casa Casa Haime y Aruba den weganen internacional na Puerto Rico, Venezuela, y Curacao. Cu Juby atrobe tin e prueba cu ora bo ta un bon deportista bo ta domina mas cu un ramo di deporte. Si ta asina, cu ta yega e ora cu bo mester dicidi cual deporte bo ta escohe pa bo haci un carrera exitoso. Tur hende ta kere cu Juby a escohe futbol. Un deporte cu cual Juby a sabi di defende e colornan di Aruba na hopi ocasion exitosamente. Na principio di su carrera deportivo cu a principia na edad di 12 aña Juby a

hunga pa Dakota Boys y despues pa Dakota Jrs. E tempo ey Dakota tabata tin 2 team Juvenil cu tabata tuma parti den e campeonato juvenil di AVB. Despues di a hunga mas of menos 2 aña den e teamnan juvenil Dakota, Juby a bai biba na Curacao na 1957 y na e isla aki a forma parti di e team popular Sitnoc den e division mayor. Asina cu e campeonato 1958 na Curacao a termina Juby a regresa Aruba y naturalmente bolbe afilia na S.V. Dakota. Na

edad di 17 aña Juby a bira portero regular di Dakota.

Juby a integra e division mayor di futbol na Aruba na aña 1959 na edad di 17 aña. No por tin ningun duda cu tabata durante e temporada cu e a practica e deporte di futbol e mihor portero di Aruba, prueba di esaki ta cu na aña 1968 Juby a firma un contract pa hunga futbol profesional cu e equipo Deportivo Portuguez na Venezuela. Cu deportivo Portuguez Juby a haya oportunidad pa hunga den Estadio Municipal di Sao Paolo. E campeonato cu Juby a participa aden na Sao Paolo, Brazil tabata nada menos cu e Copa Libertadores de America, equivalente na Copa Europa. E oportunidad aki a presenta despues di a titula campeon di e campeonato profesional di e Liga Venezolano di futbol. Manera ta conoci e Estadio Municipal di Sao Paolo ta un di e estadiunan mas grandi di futbol na mundo. Imaginabo como futbolista bo haya e oportunidad pa trapa den lastronan di futbolistanan manera Pele, Gerson, Tostao, Jairzinho, Gilmar y otro super estrelanan di futbol Brasileiro y mundial.

Juby a haya hopi otro ofertanan pa hunga futbol profesional manera, Nautico F.C. di Brazil y Cartago di Costa Rica, pero Juby a prefera di keda Aruba y defende colornan di Dakota en particular y Aruba en general.

E contract di Nautico FC tabata pa un montante di no menos cu 10 mil dolar, hopi placa e tempo ey. Cu Dakota Juby a logra 5 titulo campeonil. Na Curacao Juby ta un persona hopi conoci y stima especialmente pa su labornan futbolístico tempo cu el a bida na Curacao y tambe na momentonan cu el a bishita Curacao cu su team Dakota y seleccion di Aruba.

Durante su carera futbolístico Juby a hunga na Bonaire, Curacao, Suriname, Costa

Rica, Mexico, Venezuela, Colombia, San Salvador, Jamaica, Panama, Haiti, Puerto Rico, Brazil y Cuba, Na diferente di e paisnan aki Juby a actua na diferente ocasion. Juby lo no worde recorda unicamente pa su atrapadanan espectacular sino tambe pa su caracter simpel pa nos deportistanan actual. Semper Juby a demostra di ta un deportista den tur sentido di palabra. Un portero cu hopi talento, agilidad y confianza.

Durante su carrera como profesional Juby a subi tereno

contra hungadornan di taya di Djalma Santos di Palmeiras, y e famoso portero ruso Jashin di Dinamo-Mosco, recuerdonan cu sigur Juby jamas lo por lubida. E honor di por a participa contra equiponan manera Palmeiras y Nautico F.C. di Brazil, Dinamo di Rusia, Emelec di Peru, Union Catolica di Chile, Penarol di Uruguay ta e oportunidadnan cu no ta presenta pa mucho di nos futbolistanan. E carrera di profesional di Juby tabata bastante corto ya dura unicamente 2 aña. Juby te na e momento aki ta e unico futbolista di Aruba cu a hunga den un wega oficial na Brazil.

Na Aña 1970 Juby a regresa Aruba despues di un cortico pero exitoso carrera futbolístico den e grandinan, esta e profesionalnan. Mescos cu tempo cu S.V. Dakota a permiti Juby bai Deportivo Portuguez sin cu un suma di transferencia mester a worde paga mescos Juby a regresa Dakota sin cu un suma pa e retorno mester a worde paga. E combenio aki mester a worde cera formalmente cu Deportivo Portuguez prome cu Juby a viaha pa Venezuela. Apesar di tur e experiencia cu Juby a adquiri como futbolista profesional el a regresa Dakota. Sin ningun pretencion a cuminsa ajusta su mes na e sistema di futbol amateur sin ningun problema. Juby a keda e mesun persona humilde y dedica na su deporte. Juby a cuminsa y termina su carrera futbolístico sin cu nunca e

por a tabata discusion ni cu e mes hungadornan, ni cu hungadornan di contrario ni cu referee.

Manera e mes a bisa semper: "Un wega no ta wordo gana cu discusion cu otro hungadornan of cu referee sino demostrando na e team contrario cu bo ta mihor cune ariba tereno".

Mester bisa cu fanaticonan cu a yega di mira Juby den accion mester reconoce cu den tur e teamnan local y internacional cu a pisa suelo di Aruba por ser bisa cu tur franquesa cu en todo caso ningun di e porteronan tabata mihor cu Juby.

Na final di su carrera futbolístico activo den division mayor Juby a pasa forma parti di F.C. Roma e team integra den su mayoria di hungadornan di veterano di Dakota. Pa algun aña caba Juby ta hunga futbol pa e team di veterano Budweiser despues a hunga tambe den

team di Flor di Oriente.

Dos recuerdonan a keda cu e gran portero aki mas cu cualkier otro esta su prome salida cu seleccion Antiyano cu tabata contra Cuba y e wega pa campeonato Libertadores de America contra Palmeiras. Durante su carrera Juby no a logra subi tereno na Europa. Na aña 1962 NAVU a pone 3 seleccion ariba pia. Un seleccion a bai Europa, un seleccion a bai Jamaica y un seleccion a bai Suriname. Pa tur tres seleccionnan aki keda bon balancia NAVU a opta pa manda Juby Jamaica y no Hulanda. Por ciento e seleccion cu a bai Jamaica ta esun cu a cosecha mas exito, ya cu e seleccion aki a gana e torneo.

F.C. Roma tine grato honor y placer di dedica e tercer Mini Campeonato di futbol - Roma '88 na e gran deportista Juby Richardson